

# EBBALUWA OPAWULO EGYAWANDIKIIRE AB'E KOLOSE **Enyanjula**

OPawulo niiye eyawandikiire ab'e Kolose ebbaluwa eenu (1:1). Era yagiwandiikire ng'ali mu mabbuusu ooti-so mu Looma, omu mwanka gwa 60 nga bamalire okubyala oKurisito. OPawulo tiniye eyatandiikire ekanisa omu Kolose, ng'owaatumula 2:1, neye atekwa okubba nga yasunire kutwala buvunaanyizibwa obw'ekanisa eyo. Kyezyeka okubba kiti Epafuladiito niiye eyatandiikire ekanisa eyo olwakubba yabbaire w'e Kolose.

Ekyagirire oPawulo n'awandiika ebbaluwa eenu, kyabbaire njegesya ey'obubbeyi eyabbaire omu kanisa ey'e Kolose. Eeyo wali ooti wabbaireyo aBakurisitaayo aBayudaaya ababbaire bagezyaku okwazyaya aBakurisitaayo abamo okusengererya amateeka ag'eKiyudaaya ag'omu Ndagaano eNkaire, eino eino ery'okukomola. OPawulo awandiika eino eino kulaga ati, aBakurisitaayo mpaawo kintu kindi ekibeetaaga ooba muntu gondi ogubeetaaga okutoolaku oYesu olwa Kibbumba okubaikirirya (1:15-20). Era ati enjegesya egyo egikolera kumalabuki ga buntu tigigasa (2:8).

## **Engeri egibyecaanamu**

1. Obusugirye eeri ekanisa 1:1-2.
2. OPawulo awandiika oku bukulu bwa Kurisito eino eino ng'ayakanisya enjegesya

- ey'obubbeyi omu Kolose 1:3-3:4.  
 3. OPawulo awa ebyokulungamya 3:5-4:6.  
 4. Obusugirye eeri amakanisa agandi 4:7-18.

### *Obusugirye*

<sup>1</sup> Ninze oPawulo omutume wa Kurisito Yesu, ng'oKibbumba oweyatakire, era nga ndi aanu n'owoluganda oTemuseewo.

<sup>2</sup> Mbawandiikira inywe abatuukirirye, era aboluganda omu Kurisito abeesigwa, inywe abali omu kibuga Kolose. OKibbumba oItewaiswe abakwatire ekisa era abawe eidembe.

<sup>3</sup> Bulijo, owetubba tubasabira twebalya oKibbumba oItweye wa Musengwa waiswe oYesu Kurisito, <sup>4</sup> okuzwa owetwawuliire tuti mwikirirya omu Kurisito oYesu, era mutaka abatuukirirye bonabona. <sup>5</sup> Ebyo byonabyona mubikola olwakubba muli n'osuubi ow'okusuna ebintu ebisa ebibabategekeire omwigulu. Osuubi oyo mwamusunire owebabakobeire ekibono eky'amazima, nga niigo aMawuliro aMasa. <sup>6</sup> AMawuliro ago gaabire nga gasaalaana omu kyalo kyonakyona, era nga galeetera abantu enkabi ng'owegakolere mwinywe, okuzwera nakimo oku lunaku olumwasookeire nakimo okugawulira, era ni mutegeerera nakimo ekisa kya Kibbumba omu mazima. <sup>7</sup> Epafula omuweererya omunaiswe ogututaka eino era omuweererya omwesigwa owa Kurisito okulwaiswe, niye eyabalaabbiire obukwenda obwo. <sup>8</sup> Era Epafula yatukobeire n'oku kutaka

okumuli nakwo eeri abantu ba Kibbumba, oMwoyo oMweru okwabawaire.

<sup>9</sup> Kale swena okuzwa owetwawuliire ebibafaaku ebisa bityo, titulekerangaawo kubasabira n'okwegairira oKibbumba abaizulye okumanya ebyo ebyataka, mubimanyice nga mukolesya amalabuki gonagona, era n'okutegeera oMwoyo oMweru ebyabawa.

<sup>10</sup> Olwo kaisi mwezye okubba omu bwomi oMusengwa obwasiima, nga mumusangaalya omu ngeri gyonagyona era nga mweyongera okumanya oKibbumba. Era mwezya okubba ab'omugaso omu bintu ebisa ebimukola, era mweyongeranga okumanya oKibbumba.

<sup>11</sup> Era tusaba tuti obwezyebwe obw'ekitiisya bubawenge amaani gonagona, ni mwezya okugumira ebigosi byonabyona era ni mwemererawo omu buguminkiriza nga muli basangaali. <sup>12</sup> Era nga mwebalya oItewaiswe eyabawaire okubba abasaaniire okugabana oku mugabo oguyaliwa abatuukiriry omwigulu.

### *OKurisito n'omulimogwe*

<sup>13</sup> OKibbumba yatununwire omwifuge erya Sitaani ery'endikiirya, n'atuleeta omu bwakabaka obw'oMwanawe omutake eino.

<sup>14</sup> Era okubitira mwiye oKibbumba yatununwire era n'atusoniya ebibbibbi byaiswe.

<sup>15</sup> OKurisito niye ogutuboneramu oKibbumba ataboneka, era niye oMwanawe akira obukulu era afuga ebibbumbire byonabyona. <sup>16</sup> Ekyo kityo olwakubba iye niye eyabbumbire ebintu

byonabyona. Era ebyo nga mulimu ebiri omwigulu n'ebiri oku kyalo, n'ebyo ebiboneka n'ebitaboneka, n'emyoyo emibbimibbi egifugira omwibbanga, n'ab'obweze. Era ebintu byonabyona babibbumbire kululwe era bibbe bibye. <sup>17</sup> Iye yabbairewo ng'ebintu byonabyona bakaali n'okubibbumba; era byonabyona niye abikuuma nga bitambula kusani. <sup>18</sup> Era ekanisa niigwo omubirigwe, era iye niye omutwe gwayo. Iye niye awa abamwikirirya obwomi, omubere omu bazuukira, kagira abba niye akirira nakimo byonabyona. <sup>19</sup> OKibbumba yasiimire ati obwa Kibbumba bwonabwona bubbe omu Kurisito oyo mu bwizulye. <sup>20</sup> Era oKibbumba yasiimire kubita mu niye okusyana n'ebintu byonabyona, ebyo ebiri omwigulu n'ebiri omu kyalo, ng'aleetawo eidembe olw'eisaaye eryasusukire owebamukomereire oku musalabba n'afa.

<sup>21</sup> Nywena enyuma eedi mwabbaire yala n'oKibbumba, era nga muli balabe egyali olw'ebiseego byanywe n'ebikole byanywe ebibibibbi. <sup>22</sup> Neye atyanu oKibbumba yasyanirye na inywe, omu mubiri ogwa Kurisito oweyafiire, kaisi abaweeyo nga muli beeru, era abanambulaku kyokubanenya waire musango omu maiso ga Kibbumba. <sup>23</sup> Neye ekyo okubbaawo muli n'okusigala mu kwikirirya, era nga muli bagumu, nga timuyuuga, era nga timuzwire omu kusuubira okwo oku mwasunire omu Mawuliro aMasa agemwawuliire. AMawuliro aMasa nago, niigo agebalaabbire eeri abantu bonabona abali

oku kyalo, era nze oPawulo, ninze agebansuucirye omuweererya waago.

### *Obuweererya obwa Pawulo*

<sup>24</sup> Nsangaala ino olw'okugada okwengadamu atyanu okulwanywe. Era okugada okwange omu mubiri, kutuukirirya biibyo ebyetaagisya oku kugada okwo oKurisito okuyantegekeire olw'omubirigwe, nga niinyo ekanisa. <sup>25</sup> OKibbumba yansuucirye omuweererya ew'ekibbula eky'abaikirirya omu Kurisito, era n'ampa n'omulimo ogw'okumanyikisya ekibonokye egimuli omu bwizulye bwakyo. <sup>26</sup> Ekibonokye ekyo, niikyo ekyama ekibabbaira babisire emirembe egy'eira oku bantu ab'emigigi n'emigigi. Neye atyanu bakimanyikisirye abatuukiriryebe. <sup>27</sup> OKibbumba yatakire okukimanyikisya abantube ati obusuni n'ekitiisya ebiri omu Kurisito nywena aBatali Bayudaaya muliku n'omugabo. Era kinu niikyo ekyama nti oKurisito ali mwinywe, era n'osuubi waanywe ali nti mwaligabana oku kitiisyakye.

<sup>28</sup> OKurisito oyo niye ogutumanyikisya abantu. Tulabula, era twegesya nabuli moiza, nga tukolesya amalabuki gonagona oKibbumba agatuwaire, kaisi oolwo tuleete nabuli muntu eeri oKibbumba ng'atuukiriire omu kubba ekintu ekimo n'oKurisito. <sup>29</sup> Ekyo niikyo ekigira ni nkalabana, era ni neefuda nga nesiga amaani aga Kurisito amabitiriri, ago agakolera mu nze.

## 2

<sup>1</sup> Ntaka mumanye ng'owendwanikana einokulwanywe omu kusaba, n'oku lw'abaikirirya ab'omu kibuga e Lawodikiya, era n'oku lw'abo bonabona abatambonanguku. <sup>2</sup> Ekyo nkikola, kaisi emyoyo gyabwe n'egyanywe gisangaale, nga mubba kimo omu kutakangana, era nti abantu bonabona basune enkabi mu bwizulye era bamanyire nakimo ekyama kya Kibbumba. Ekyama ekyo nga niye oKurisito. <sup>3</sup> Mwiye niye oKibbumba omu yabisire ekyobusuni ekyamalabuki, n'okumanya kwonakwona. <sup>4</sup> Ekyo nkibakobera, kaisi tiwaabbaawo abagotesyagotesya, ng'akolesya ebibono ebitendera. <sup>5</sup> Newankubbaire nga tindi na inywe omu mubiri, neye nga mbaseegaku era nga mbasabira, era nsangaala okubona nti mutebenkereire, nga muli bagumu omu kwikirirya oKurisito.

### *Obwomi obwizulye omu Kurisito*

<sup>6</sup> Kale ng'owemwaikiriirye oKurisito oYesu ng'oMusengwa waanywe, mweyongerenge okubba omu bumo naye. <sup>7</sup> Era mweyongerenge okumumanya n'okukola ebyataka, nga muli bagumu omu kumwikirirya ng'owebabeegeserye omu kusooka, era nga mumwebalya olwa buli kintu.

<sup>8</sup> Mubone nga tiwaabbaawo muntu yenayena abagotesyagotesya era n'afuga ebiseego byanywe, ng'akolesya amalabuki ag'okuteebereza okw'ekikugu, ag'abantu-obuntu neye nga mpaamu mugaso era

g'obubbeyi. Amalabuki ago geemerera ku bulombolombo obw'abantu na ku bwezye obw'emizimu neye tiku Kurisito.

<sup>9</sup> Mazima, obwa Kibbumba bwonabwona buli mu Kurisito n'oweyabbaire oku kyalo ng'omuntu. <sup>10</sup> Era nywena mwasunire obwomi obwizulye olw'okumwikiririyamu. Iye afuga emyoyo gyonagyona egy'obwezye era egifugira omwibbanga. <sup>11</sup> Olwa kumwikiririyamu mwasunire okubakomola omu bwomi bwanywe, ng'abateeresya amaani ag'ekibbikibbi agakolera omu mubiri. Abantu okukomola okubakola tikwezya kukola ekyo neye kukomola oKurisito okwakola.

<sup>12</sup> Owebabatizire mwabbaire ng'abebaliikiire aamo n'oKurisito, era ni mubba ng'abazuukiriire aamo naye olwakubba mwikirirya muti oKibbumba omu maanige yamuzuukizire.

<sup>13</sup> Nywena ababbaire abafu omu myoyo olw'ebibbibbi byanywe n'olw'okubba nga timuli bakomole b'emibiri, oKibbumba yabasuucirye boomi omu Kurisito, era yatusoniire ebibbibbi byaiswe byonabyona.

<sup>14</sup> OKibbumba oweyawaireyo oYesu okufa nga bamukomerera oku musalabba yasaliremu era n'atoolawo ebiwandiiko ebyabbaire bituvunaana ni bitusalira omusango, n'ogema ooti-so oKibbumba yabikwaite n'abikomerera oku musalabba. <sup>15</sup> Era omu kufa kwa Kurisito oku musalabba ogwo, oKibbumba yawangwire emyoyo emibbimibbi n'ab'obwezye abafugira

omwibbanga, era n'abamalamu amaani era n'abaswaza omu lwatu.

<sup>16</sup> Kale timufangayo omuntu yenayena owabakobanga ati oKibbumba yababonereza olw'ebintu ebyo ebimulya n'oku lw'ebyo ebimunywa, ooba olw'okutakulya enaku enkulu omu mwanka, n'oku kumasuka kw'omweri, waire okutakuuma eSaabbaato.

<sup>17</sup> Ebyo byonabyona byabbaire kiiriirye-bwiriirye eky'ebyo ebyabbaire byaba okwiza. Neye ekintu ekinanyerenyeere niye oKurisito.

<sup>18</sup> Timwikiriryanga omuntu yenayena n'abatoola oku kusinza oKurisito ni mufirwa okusuna ekirabo eky'obwomi obutawaawo. Timuganyanga omuntu ow'engeri eyo ataka mulage okwewombeeka okw'obubbeyi, omu kwerumya kw'omubiri, ooba anoonia okusinza abamalaika kaisi oKibbumba amubonekere omu ngeri ey'enjabulo. Omuntu nago abba atakanga ino okuwa ensonzolaye oku bintu ebyaboine ng'akolesya ebibono kibbiiryo era ebiseegobye eby'abantu-obuntu bimuleetera okwekudumbalya.

<sup>19</sup> Era omuntu oyo abba tali omu Kurisito oyo omutwe, aliisya omubiri gwonagwona, era n'agaita amayungiro n'enyama yaagwo, kaisi ni gukula ng'oKibbumba owagwezyesya gukule.

*Okufeera aamo n'oKurisito n'okubba aboomi*

<sup>20</sup> Inywe mwafeereire aamo n'oKurisito eeri enkola egy'ekyalo era ni mubunuka obwezye obw'emizimu, obwo obufuga ekyalo. Kale lwaki



tete mwebitya ooti bantu abo ekyalo egikikaali kifuga, kaisi ni mwikirirya ikyo okubawa ebi-ragi-ro ooti biinu: <sup>21</sup> “Tokwatanga ku kinu; tokombanga kwekyo; kidi tokiguunyangaku?” <sup>22</sup> Okukola ebyo byonabyona, mpaawo kyeki-gasa. Okwo nago kubba kusengererya mateeka n’okwegesya okw’abantu-obuntu. <sup>23</sup> Kiri kiti amateeka ago gaboneka ooti galaga amalabuki mangi omu ngeri ey’okusinza oKibbumba, ibo abantu egibeyiirewo bonkani, n’omu kwe-wombeeka okw’obubbeyi, era n’omu kulumya omubiri. Neye mpaawo kigagasa omu ku kufuga okw’okwegomba kw’omubiri.

### 3

<sup>1</sup> Mwazuukiriire aamo n’oKurisito omu bwomi bwanywe obw’omwoyo. N’olwekyo muyayanirenge bintu eby’omwoyo ebizwa omwigulu egiri oKurisito, egyatyaima n’oKibbumba omu kifo eky’ekitiisya eino.\* <sup>2</sup> Muteekenge emyoyo gyanywe ku bintu biibyo eby’omwigulu, neye tiku bintu by’oku kyalo. <sup>3</sup> Ekyo kityo olwakubba inywe mwafiire, era obwomi bwanywe obw’omu mwoyo babubisire egiri oKurisito omu Kibbumba. <sup>4</sup> Era oKurisito oyo nago, iye abawa okubba aboomi omu mwoyo, oweyaliboneka, nywena mwalibonekera aamo naye nga muli n’ekitiisya.

#### *Obwomi obukaire n’obwomi obuyaaka*

---

\* **3:1** 3:1 Ekifo eky’ekitiisya eino, ooba, Oku lubba olw’engalo endi-ro eya Kibbumba. **3:1** 3:1 Zab 110:1

<sup>5</sup> Kale mulekewo ebikole eby'okwegomba okubbikubbi okw'omubiri, nga niimwo omuli: Obulendi, n'okwegaita omu ngeri etali ey'obutonde, n'obukaba, n'okwegomba okw'ensoni, n'okuyayaanira ebintu eby'e kyalo, okwo nga niikwo okusinza ebifaananyi.

<sup>6</sup> OKibbumba asunguwalira era ayaba okubonereza n'obulwa abantu abakola ebyo. <sup>7</sup> Era nywena ebinanyere ebyo niibyo ebimwakolanga eira omu bwomi bwanywe

nga mukaali kwikirirya oKurisito. <sup>8</sup> Neye atyanu binu byonabyona mubireke: Obusungu,

n'enkwe, n'ococo, n'okusibirirya oku bantu, era n'okwemula, ibyo tibyazwanga omu munwa gwanywe. <sup>9</sup> Timwabbeyangananga, olwakubba mweyambwirye obwomi obukaire n'ebikole byabwo ebibbibbi. <sup>10</sup> Era mwazwaire

obwomi obuyaaka, obwo oKibbumba obwayaba ng'ayongera okwirya obuyaaka omu kifaananyikye, kaisi oolwo mumutegeere omu bwizulye. <sup>11</sup> Omu bwomi bunu obuyaaka

tikikulu kwabulamu tuti onu Muyonaani n'oodi Muyudaaya, ooba onu mukomole n'oodi timukomole, onu jwalo, oodi mupuuye, onu mugalama oodi w'eidembe. Wazira oKurisito nga niiye ekintu ekikulu, era nga niiye ali mwabo bonabona abamwikiririyamu.

<sup>12</sup> Muli bantu oKibbumba abeyalondere okubba ababe, n'abawa okubba abeeru era abaataka eino. N'olwekyo mubbenge bantu abaizwire okusaasira, n'ekisa, n'obuwombeeki,

n'eiwooyo, era n'okuguminkiriza.  
<sup>13</sup> Muguminkirizaganenge era ni musoniyangana nabuli owewabbaawo alumirye omwinaye. Muteekwa okusoniyangana omu ngeri enanyere eyo ng'oMusengwa waiswe oweyabasoniyire inywe. <sup>14</sup> Era n'okukira kwebyo byonabyona, mwongereryeku okutaka. Okutaka okwo niikwo okukalangulira aamo abaikirirya omu Kurisito omu bumo obwizulye.

<sup>15</sup> Eidembe oKurisito eryagaba, liizulenge omu myoyo gyanywe olwakubba oKibbumba yabeeteire kubba mwidembe nga muli aamo ng'ebitundu eby'omubiri ogumo. Era emyoyo gyanywe giizulenge okusiima oKibbumba. <sup>16</sup> Ekibono kya Kurisito, omu busuni bwakyo bwonabwona, kityamire nakimo omunda mwinywe era kirungamyenge ebintu byonabyona ebimutumula n'ebimukola. Era mwegesyanganenge ni mulabulangana omu malabuki gonagona. Nga mwizwire okwebalya omu myoyo gyanywe, mwemberenge oKibbumba eZabbuli, n'enyembo egy'ebika ebitali bimo oMwoyo egyabawa okuyiia. <sup>17</sup> Nabuli kintu ekimutumula ooba ekimukola, mukikolenge omu liina lya Musengwa waiswe oYesu, era nga mu mubitamumu okwebalya oKibbumba oltewaiswe.

### *Ebitusaanira omu bwomi obuyaaka*

<sup>18</sup> Inywe abakali mugonderenge abaibaanywe, ng'abaikirirya oMusengwa waiswe owebasaani-ire okukola.

<sup>19</sup> Kaisi inywe abasaiza mutakenge abakali baanywe, era timwabakaawuukiranga.

<sup>20</sup> Inywe abaana muwulirenge ababyaire baanywe omu bintu byonabyona, olwakubba ekyo kisangaalya oMusengwa.

<sup>21</sup> Abaiteeye b'abaana, timulumiriranga abaana baanywe nga mubazuma buli owebabbenga demba ni bawaamu amaani okukola ebintu ebisa.

<sup>22</sup> Abagalama, muwulirenge abasengwa baanywe ab'oku kyalo kunu omu bintu byonabyona, timu kiseera ekibabba nga bababona kaisi babasiime kyonkani, neye mubaweereryenge n'omwoyo ogunambulamu bubbeyi, nga mukola mutyo olw'okuweesya oMusengwa waiswe ekitiisya.

<sup>23</sup> Nabuli ekimukola, mukikolenge n'omwoyo gwanywe gwonagwona, ng'abakolera oMusengwa waiswe, neye tinga abakolera abantu.

<sup>24</sup> Mumanye muti oMusengwa waiswe yalibawa omugabo ogw'ebintu ebiyasuubizire ng'empeera yaanywe, olwakubba oKurisito niiye oMusengwa waanywe ogumuweererya.

<sup>25</sup> Era nabuli akola ekibbikibbi, balimubonereza olw'ekibbikibbi ekyo ekiyakolere, olwakubba timwalibbaamu kwekubbira.

---

**3:18** 3:18 Bef 5:22; 1Pe 3:1    **3:19** 3:19 Bef 5:25; 1Pe 3:7    **3:20**  
 3:20 Bef 6:1    **3:21** 3:21 Bef 6:4    **3:25** 3:22-25 Bef 6:5-8    **3:25**  
 3:25 Ama 10:17; Bef 6:9

## 4

<sup>1</sup> Abasengwa b'abagalama, mubityenge naku-sani abagalama baanywe, era nga timwekubbira, nga mumaite muti nywena muli n'oyo abaliku obwezye, oMusengwa aali omwigulu.

<sup>2</sup> Munyikirenge okusaba, nga timwiririra era nga timwerabira okwebalya oKibbumba olw'ebyabakoleire. <sup>3</sup> Era swena mutusabirenge, oKibbumba atutemere amanzira, kaisi twezye okukobera abantu ekibonokye, era tubamanyikisye ekyama ekikwata oku Kurisito. Kaisi ng'okukola ekyo niikyo ekyansibisirye omu mabbusu. <sup>4</sup> Munsabire oKibbumba anjezyesye okukobera abantu ekyama ekyo omu ngeri etegeerekeka okusani eino ng'owensaaniire okukola. <sup>5</sup> Abo abakaali okusuna okwikirirya, mukolaganenge nabo n'amalabuki, nga mukolesya nabuli nkabi egimusuna okubabbeera okumanya oKurisito.

<sup>6</sup> Bulijo mutumulenge omu ngeri ewooma era esangaalya, kaisi mwezye okumanyanga engeri egikisaaniire okwiramumu nabuli moiza ali n'ekyabuulya oku kwikirirya kwanywe.

### *Ebisembayo*

<sup>7</sup> OTukiko owoluganda ogututaka eino, omuweererya wa Kurisito omwesigwa, era omukoli omunaiswe omu mulimo ogwa Musengwa waiswe, aiza kubakobera ebyantuukireku. <sup>8</sup> Niikyo ekigirire ni mmutuma egimuli, kaisi mumanye byonabyona ebitufaaku, era agumye emyoyo gyanywe omu kwikirirya

oMusengwa. <sup>9</sup> Era aamo naye, ntumire Onesimo owoluganda omwesigwa era omutake eino era omuntu ow'e waanywe eeyo. Baiza kubakobera byonabyona ebifa eenu.

<sup>10</sup> Esitaluuko omusibe omunange, n'oMaako omwiwa wa Bbalunaba babasugiirye. Nabawandikiireku ebifa oku Maako, kale oweyaliiza egimuli mumusangaliranga.

<sup>11</sup> N'oYesu ogubeeta oYusito, abasugiirye. Abo niibo bonkani aBayudaaya abakola aamo na nze omulimo ogw'okulaabba aMawuliro aMasa ag'obwakabaka bwa Kibbumba, era bambeera ino.

<sup>12</sup> Epafula yena ow'e waanywe eeyo, omuweererya wa Kurisito Yesu, abasugiirye. Era buliijo abasabira ino ati mubbe omu bwomi obutuukiriire, n'abategereire nakimo oKibbumba ebyataka.

<sup>13</sup> Ntaka okubakakasa nti Epafula, abakoleire ino inywe aamo n'abaikirirya omu Kurisito ab'omu kibuga eky'e Lawodikiya, era n'ab'omu kibuga eky'e Yerapooli.

<sup>14</sup> OLuuka omusawo era owoluganda ogututaka eino, n'owoluganda oDeema babasugiirye.

<sup>15</sup> Mutusugirirye aboluganda ab'omu Lawodikiya. Era Musugirye omwonyoko waiswe oNinfa, n'ekanisa ekumbaanira omu kisitokye.

<sup>16</sup> Nga bamalire oku basomeremu ebbaluwa eenu, muli n'okubona muti bagitwala okugisomera ekanisa ey'e Lawodikiya. Era nywena

---

**4:8** 4:7-8 Bef 6:21-22    **4:9** 4:9 Fir 1:10-12    **4:10** 4:10 Bik 12:12,25; 13:13; 15:37-39; 19:29; 27:2; Fir 1:24    **4:12** 4:12 Bak 1:7; Fir 23    **4:14** 4:14 2Te 4:10-11; Fir 1:24

muli n'okubona muti babasomera ebbaluwa eginawandikiire ab'e Lawodikiya.

<sup>17</sup> Era mukobe Alikipo muti, "Weefudeku okutuukirirya obuweererya oMusengwa waiswe oKurisito obuyakukwatisirye."

<sup>18</sup> Nze oPawulo, ninze mpandiikire n'engalo yange obusugirye bunu. Timwerabira muti ndi mu mabbuusu, kale munsabirenge. OKibbumba abakwatirenge ekisa.

**Endagaano Empyaka Omu Lugwere**  
**Gwere: Endagaano Empyaka Omu Lugwere (Bible)**

copyright © 2019 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source  
files dated 29 Jan 2022

03698e2d-9c8d-5b1f-bc49-b0066e860180